

UN POCO DI TUR COS

JOSSY M. MANSUR

Bo tabata sa cu e Egipcianan antiguo tabata entrena macaconan baboon pa sirbi como mesonero, o sea atende mesa?

Den siglo binti te awor dos objeto a dal tera for di espacio cu suficiente forza pa destrui un ciudad henter. Ambos, uno na 1908 y e otro na 1947, a cay na Siberia. Pa puro suerte ningun ser humano a ser lastima den ningun di e dos ocasionnan ey.

E dureza di ijs por compara cu e dureza di concret. Ambos ta parce di ta mes solido.

Un plaga di bebemento burachi a sigui e plaga di Morto Preto na Europa durante e añanan 1300 y a keda hasta despues cu e enfermedad a bay. E teoria e tempo ey tabata cu bebida fuerte tabata un prevencion contra contagio di e enfermedad. No ta asina, pero e tabata haci e bebedor menos preocupado pa e enfermedad, cu toch tabata algo.

Entre Februari y Mei 17, 1944, e aliadonan a kibra e resistencia di e forzan aleman di defensa despues di hopi luna di ataquenan terrestre durante segunda guerra mundial. El a sosode alrededor di un pueblo chiquito yama "Cassino".

Bo tabata sa cu e ultimo partinan di curpa pa desintegra despues di morto ta cabey y hufia?

Den e lenguaje skirbi chine, e ideografo cu ta representa e concepto "problema" ta dos muher bao e mesun dak!

E promer homber blanco cu a drenta Grand Canyon tabata John Wesley Powell, dia 29 di Mei 1869. Esaki a sosode despues di e guerra civil Mericano.

Na aña 1848, un hut di stro na Aruba cu tereno tabata costa Fls. 150. Un cas pa pueblo no tabata costa mas di Fls.50. Un salario diario tabata consisti di 50 cent y un cabay por a produci 50 florin den un venta.

"Canada ta un pais cu ta triunfo di politica ariba geografia y ariba economia, y tambe a veces ariba sentido comun" segun Robert T. Elson.

"Agora" tabata e plaza publico y mercado di Grecia antiguo na unda reunionnan civico y comercial tabata tuma lugar. E famoso "agora" di Atenas a ser extensivamente excava y reconstrui.

Famoso ultimo palabranan di Max Bear na aña 1959: "Oh, Dios, cla mi ta".

Laurence Olivier a haci su debut como actor den un show di variedad na Brighton, Inglatera. El a trompica contra e luznan y a cay, provocando hopi risa.

Fabula: Un pantera cu a perde su yiunan den man di un cazador, tabata yora dia y anochi cu rugidonan cu no tabata laga e otro animalnan cu tabata habita e selva ey un solo momento di descanso. Un dia un zoro, cansa di scucha e kehanan continuo di e pantera, a presenta cerca dje y a bise: --"Mira amigo, mi kier hacibo un solo pregunta: tur e binanan cu bo a devora no tabata tin mama?" -- E pantera a contesta cu si. E Zoro a bise e ora: ningun di nan a molestia nos manera abo cu bo kehanan. Pesey consolabo mescos cu nan y no kita nos soño cu bo lamentacionnan.

Moraleja? Nunca nos ta yora pa e penanan di nos prohimonan, pero solamente pa di nos.

CER'I NOKA TA SER PREPARA PA DIAVIERNA SANTO

ORANJESTAD(AAN)— Den un comunicado di Comision Juventud 85 ta ser treci dilanti cu manera ta conoci, e proximo evento di Comision Juventud 85 cu na December di aña pasa a organiza e exitoso evento Ban cu Mama Maria, lo ta un observacion masal di Diavierna Santo.

For di e diferente angulonan ta ser traha ariba e preparacionnan necesario pa e dia importante pa religion Catolico, cu ta considera Semana Santa un di e temporadan principal di aña, for di un punto di vista di religion.

Den cuadro di e preparacionnan, antayera un grupo di persona a reuni na Cero Noca, caminda e observacion masal di Diavierna Santo lo culmina, despues di e paradanan silencioso di auto y e peregrinacion na pia.

Tabata presente na e sitio, ademas di represen-

tantenan di Comision Juventud 85, Pastoor di Santa Cruz, representantenan di e diferente instancianan cu lo percursa pa e trabaonan di restauracion y limpieza necesario na e sitio y tambe representante di e grupo di mucha cu lo bay presenta e Caminda di Cruz bibo, mescos cu esnan encarga cu sound system, etc.

Hunto a revisa e diferente aspectonan pa por tene e Caminda di Cruz bibo na Cero Noca na e asina yama Teatro di aire libre, cu ta uno di e sitio nan mas fascinante di Aruba cu lo ser poni atrobe den atencion.

Manera ta conoci, Juventud 85 ta trata pa den cuadro di celebracion di Añ idi Juventud, duna juventud guia espiritual, organisando eventonan cu un base religioso, pero cu alavez ta pone acento ariba costumbrenan di

antes, cu mester ser preservado.

Asina pues e bishita na diferente Misa lo keda restableci cu e peregrinacion masal pa auto, mientras lo tin un peregrinacion corto na pia, pa bay observa e Caminda di Cruz na Cero Noca, cu lo ser poni den centro di atencion.

Tur detayes a ser tuma na consideracion pa asina percursa pa atrobe Juventud duna ejemplo con pa tene eventonan na un forma ejemplar. Juventud ta ser involvi completamente atrobe den e proyecto cu lo haya e nomber di Na Caminda pa Su Cruz y cu lo culmina Semana Santa, ora juventud di mayornan, hunto cu mayornan lo bay participa na e observacion masal di Diavierna Santo.

Segun Mito Croes:

GOBIERNO CENTRAL A HACI NADA CONCRETO

ORANJESTAD(AAN)— Den e programa radial di AVP, Mr. Mito Croes a elabora ariba e desaroyonan den gobernacion tanto ariba nivel central como insular.

El a muestra cu e siman cu a pasa e actual coalicion central a drenta su di seis luna di gobernacion. Tumando na cuenta cu ta trata di un Gobierno cu ta sinta te na fin di e aña aki, Mito Croes a constata cu e Gobierno den cual MEP ta participa ya a pasa un tercera parti di su periodo di gobernacion.

Repasando loke e Gobierno cu a keda presenta como un Gobierno di accion a haci den e tempo aki, Mito Croes a yega na e conclusion cu fuera di viajenan pa exterior, nada concreto a ser realiza.

E dirigente di AVP a bise cu promer tabata tin

diferente excusa cu ta spera diferente comision, pero ya pa tres luna tur e consejonan a drenta, pero e Gobierno a keda paraliza.

Mientras e por a constata cu e situacion ta empeorando, nada pero nada a wordo haci.

Mientrastanto na momento cu Gobierno Central tabata bay tuma medida nan a ser pidi pa warda ariba Gobierno di Curacao mientras cu e representante di St. Maarten a bise cu e medidanan cu Gobierno Central

tin pensa di tuma ta coy loco, manera Mito Croes a bise.

El a bise cu pa evita problema den coalicion, Gobierno Central no ta haciendo nada, loke ta tristo en vista di especialmente e situacion financiero economico di Antillas y sigur Aruba.



UN CRISTIAN NO CONOCE DESESPERACION,
UN BON CATOLICO
TA PONE SU FE DEN DIOS!

Accion Catolico pa Cuaresma